

## I - ARABAKO BATZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

Arabako Foru Aldundia

### OGASUN, FINANTZA ETA AURREKONTU SAILA

**151/2020 Foru Agindua, martxoaren 24koa, onesten dituen pertsona fisikoen errentaren gaineko zergaren eta ondarearen gaineko zergaren 2019ko ekitaldiko aitortpenak aurkezteko arauak eta modalitateak**

Pertsona fisikoen errentaren gaineko zergaren azaroaren 27ko 33/2013 Foru Arauak 102.7 artikuluan xedatutakoaren arabera, "autolikidazio ereduak eta autolikidazio modalitate erraztu edo berezien erabilera Ogasun, Finantza eta Aurrekontu Saileko foru diputatuak onartuko ditu. Era berean, foru diputatu horrek finkatuko ditu aurkezteko modu eta epeak nahiz euskarri telematikoen bitartez autolikidazioak aurkezteko egoerak eta baldintzak".

Bestalde, Ondarearen gaineko Zergaren martxoaren 11ko 9/2013 Foru Arauak 36. artikulua-ren Bat apartatuan ezartzen duenez, subjektu pasiboak behartuta daude Ogasun, Finantza eta Aurrekontu Saileko foru diputatuak ezarritako leku, modu eta epeak errespetatuz autolikidazioa aurkeztera eta, hala badagokio, zerga zorrak ordaintzera.

Aurki hasiko da pertsona fisikoen errentaren gaineko zergaren eta ondarearen gaineko zergaren 2019ko ekitaldiko aitortpenak aurkezteko epea.

Hori dela eta, besteak beste, aitortpen modalitateak eta aitortpenak aurkezteko epea arautu behar dira.

Xedapen hau da tresnarik egokiena helburu horiek lortzeko. Araudi honek proportzionaltasun printzipioa betetzen du, eta xedapen horrekin bete nahi den beharrari erantzuteko ezinbestekoak diren arauak biltzen ditu. Ez dago xede horretarako beste neurririk, hartzaileen eskubideak gutxiago murrizten dituenik edo hartzaileei betebeharrak gutxiago jartzen dizkienik.

Ekimen honen bidez segurtasun juridikoaren printzipioa bermatzen da, eta koherentea da nazioko eta Europar Batasuneko gainerako ordenamendu juridikoarekin.

Foru agindu hau izapidetzean gardentasun irizpideari jarraitu zaio, zeina Administrazio Publikoaren Administrazio Prozedura Erkidearen urriaren 1eko 39/2015 Legeak 129. artikuluan arautzen baitu.

Arabako Foru Administrazioaren Kontsulta Batzordearen Arautegi Organikoak 3. artikulua-ren 3. apartatuan xedatutakoaren arabera, batzorde horren txostena ez da nahitaezkoa.

Zuzeneko Zergen Zerbitzuak horren harira emandako txostena aztertu da.

Horregatik, eta dagozkidan ahalmenak erabiliz, hau

#### XEDATZEN DUT

#### **1. artikulua. Pertsona fisikoen errentaren gaineko zergaren eta ondarearen gaineko zergaren aitortpen modalitateak**

Bat. Pertsona fisikoen errentaren gaineko zerga.

Pertsona fisikoen errentaren gaineko zergaren aitortpenak hurrengo sistema hauen bidez aurkez daitezke:

A) "rentafácil"

1. Arabako Foru Aldundiak zenbait zergaduni bidaltzen dizkien autolikidazio proposamenak dira. Haiek autolikidazioaren balio juridikoa izango dute, zergadunak proposamen horrekin ados dagoela adierazten duen unean. Adostasuna adierazi eta gero, itzulketa egingo da edo, hala badagokio, ateratzen den kuota helbideratuko da.

2. Zergadunak, horretarako emandako epearen barruan, ez badu adierazten jasotako proposamenarekin ados dagoela, administrazio jarduna egin gabekotzat emango da eta zergadunak pertsona fisikoen errentaren gaineko zergaren aitorpena aurkeztu beharko du, horretara beharturik badago, gainerako sistemetako baten bitartez.

B) "rentared"

Pertsona fisikoen errentaren gaineko zergaren aitorpena egiteko Arabako Foru Aldundiak prestatuturiko laguntza programa erabiliz zergadunek egindako aitorpenak dira. Aitorpen horiek Arabako Foru Aldundiaren egoitza elektronikoen bidez ([www.araba.eus](http://www.araba.eus)) bidaltzen dira.

Aitorpen horiek bidaltzeko, balioko du IZENPEk emandako Bak identifikatzeko eta sinatzeko bitartekoak.

C) "rent@raba"

1. "rent@raba" pertsona fisikoen errentaren gaineko zergaren aitorpenak egiteko zerbitzu bat da, Arabako Foru Aldundiaren ogasun bulegoen bidez eta finantza erakunde laguntzaile baimenduen bidez ematen zaiena zenbait baldintza betetzen dituzten zergadunei.

Era berean, Arabako Foru Aldundiaren aurrean kreditatutako kudeatze eta aholkularitza agentziek sistema honen bidez aurkez ditzakete zergadunen aitorpenak.

2. Zerbitzu hau doan emango zaie Arabako Foru Aldundiaren ogasun bulegoetan pertsona fisikoen errentaren gaineko zergaren zergadun guztiei, salbu eta kasu hauetakoren batean daudenei:

- a) Jarduera ekonomiko bat egiten dutenei.
- b) 2019ko ekitaldian ohiko etxebizitza eskualdatu dutenei.
- c) 2019ko ekitaldian balio higikorren edo higiezin salmentako hiru eragiketa baino gehiago egin dituztenei.

Bi. Ondarearen gaineko zerga.

Ondarearen gaineko zergaren aitorpenak Interneten bidez aurkeztu behar dira. Zergadunek eta Arabako Foru Aldundiaren aurrean kreditatutako kudeatze eta aholkularitza agentziek egingo dituzte aitorpenak, Arabako Foru Aldundiak prestatuturiko ondarearen gaineko zergaren laguntza programa erabiliz, eta egoitza elektronikoen ([www.araba.eus](http://www.araba.eus)) bidez bidaliko dira.

Aitorpen horiek bidaltzeko, balioko du IZENPEk emandako Bak identifikatzeko eta sinatzeko bitartekoak.

Hiru. Pertsona fisikoen errentaren gaineko zergaren aitorpenak "rent@raba" modalitatearen bidez aurkezteko eta ondarearen gaineko zergaren aitorpenak aurkezteko (bi kasuetan, aitorpenak gestoria edo aholkularitza batean egiten direnean, eta hark ez badihardu zergadunaren borondatezko ordezkari gisa, edo finantza erakunde laguntzaile batean egiten direnean), nahitaezko identifikazio etiketa izan beharko da, azaroaren 19ko 99/1996 Foru Dekretuaren 4. artikuluan xedatutakoarekin bat etorriz.

**2. artikulua. Laguntza programen banaketa**

Laguntza programak [www.araba.eus](http://www.araba.eus) helbidean deskarga daitezke.

**3. artikulua. Frogagiriak**

Pertsona fisikoen errentaren gaineko zergaren eta ondarearen gaineko zergaren aitorpenekin batera, zergadunen zerga datuetan jaso gabe egonik edo jasota daudenetatik ezberdinak izanik aplikatzekoak diren frogagiriak aurkeztuko dira, aitorpenean agertu behar diren mota guztietako eragiketa, errenta, gastu, diru sarrera, murrizketa eta kenkarien arabera.

Arabako Foru Aldundiak kreditatutako kudeatze eta aholkularitza bulegoek eta finantza erakunde laguntzaileek rent@raba programaren bidez egindako aitortpenei erantsitako frogagiriak telematikoki aurkeztuko dira aitortpenarekin batera.

#### **4. artikulua. Pertsona fisikoen errentaren gaineko zergaren eta ondarearen gaineko zergaren 2019ko ekitaldiko aitortpenak aurkezteko epea**

Hona hemen pertsona fisikoen errentaren gaineko zergaren eta ondarearen gaineko zergaren 2019ko ekitaldiko aitortpenak aurkezteko epeak:

##### 1. "rentafácil":

Zergadunei bidalitako aitortpen proposamenak 2020ko apirilaren 15etik urriaren 28ra baieztatu ahal izango dira.

Proposamenen aldaketak Foru Ogasunaren bulegoetan egin ahal izango dira, 2020ko irailaren 8tik urriaren 28ra, baldin eta zergaduna ez badago foru agindu honen 1. Bat artikuluko C) letrako 2 puntuan jasoriko baztertze kasuren batean.

##### 2. "rent@raba"

– Hasiera data:

a) Finantza erakunde laguntzaileetan, eta Arabako Foru Aldundiaren aurrean kreditatutako kudeatze edo aholkularitza bulegoen bidez: 2020ko apirilaren 15a.

Edonola ere, entitate horiek zerbitzu hau emateko, COVID-19 koronabirusaren epidemiak eragindako egoera eta, hala badagokio, epidemia horrek sortutako osasun krisiaren ondorioz deklaraturako alarma egoerak dirauen bitartean ezarri beharreko legeak izango dira kontuan.

b) Foru Ogasunaren bulegoetan: 2020ko irailaren 8a.

– Amaiera data:

a) Foru Ogasunaren bulegoetan: 2020ko urriaren 28a.

b) Finantza entitate laguntzaileetan eta Arabako Foru Aldundiaren aurrean kreditatutako gestoria edo aholkularitzetan: 2020ko urriaren 30a.

##### 3. "rentared":

– Hasiera data: 2020ko apirilaren 15a.

– Amaiera data: 2020ko urriaren 30a.

##### 4. Ondarearen gaineko zergaren aitortpenak:

– Hasiera data: 2020ko apirilaren 15a.

– Amaiera data: 2020ko ekainaren 25a.

#### **5. artikulua. Ordainketa**

Bat. Pertsona fisikoen errentaren gaineko zergaren autolikidazioak emaniko zenbatekoa borondatezko aldi ordaintzeko epea 2020ko azaroaren 20 arte luzatuko da.

Bi. Ondarearen gaineko zergaren autolikidazioak emaniko zenbatekoa osorik sartu beharko da 2020ko ekainaren 25 arte.

Hiru. Oro har, pertsona fisikoen errentaren gaineko zergaren eta ondarearen gaineko zergaren aitortpenak aurkezteak berekin dakar kuotak helbideratzea zergadunek beren aitortpenetan adierazitako kontuetan.

Edonola ere, ordainketa pasabidearen edo ordainketa gutunaren bidez ordaindu ahalko da pertsona fisikoen errentaren gaineko zergaren kuota rentaraba eta rentared modalitateetan; baita ondarearen gaineko zergaren kuota ere.

2020ko ekainaren 17tik aurrera, ezin izango da helbideratu ondarearen gaineko zergaren kuota, eta dirua sartu beharko da ordainketa pasabidearen bidez edo ordainketa gutunaren bidez.

#### AZKEN XEDAPENA

Foru Agindu honetako xedapenak ALHAOn argitaratu eta hurrengo egunean sartuko dira indarrean, eta 2019ko ekitaldiko pertsona fisikoen errentaren gaineko zergaren eta ondarearen gaineko zergaren aitortzei aplikatuko zaizkie.

Vitoria-Gasteiz, 2020ko martxoaren 24a

*Ogasun, Finantza eta Aurrekontu Saileko foru diputatua*

**ITZIAR GONZALO DE ZUAZO**

*Ogasun zuzendaria*

**MARÍA JOSÉ PEREA URTEAGA**